

Friday, August 8, 2025

Time - 2:30pm

GOVERNOR VISITS LUNGLEI

Larsap Gen (Rtd) Vijay Kumar Singh chuan vawiin khan Lunglei tlawhin Department hotu hrang hrang a kawm bakah Kohhran hruaitute leh tlawmngai pawl a kawm a, an harsatna leh bawhzui ngaite hmalak pui turin Larsap hnenah hian an thlen a ni. Larsap hian 20 Assam Rifle Camp pawh tlawhin Ex-Servicemen ten an harsatna hrang hrang an thlen a. Khuain a zirloh avangin programme duan sa anga hun hman theih anihloh avangin Larsap hi Aizawl-a a let dan tur sawi theih a ni rihlo a ni.



CM : EKTA MALL

Nimin khan Chief Minister Pu Lalduhoma chuan Aizawla PM Ekta Mall satu tura thlan, Ministry of Health & Family Welfare hnuiaia Public Sector Undertakings, HLL Infra Tech Services thuneitute chu New Delhi Mizoram House-ah a kawm a. An hnathawh tur chungchang a sawipui. Mizoram Ekta Mall hi tun thla ni 23 ah a lung phum tura ruahmanna kalpui mek a ni a. A sak hna hi tan nghal a ni ang. Chief Minister hian, a hun taka sak zawh tum tur leh quality tha taka sa turin a chah a. Tuna Aizawla RIPANS an sak mek pawh a hun taka zo ngei turin a hrilh a ni. Nimin vek khan Chief Minister hian Director General, NECTAR Dr. Arun Kumar Sarma chu a kawm a. PM DevINE hnuiaia Buangpuia Changel sawngbawlina Project an kalpui mek chanchin sawipuiin, hna chak taka an thawh theihna tur leh a thawh zawh thuai theih dan tur te an sawidun a ni.



PROJECT BLOOM

Lunglei District Bawrhsap kaihhruainaa Lungsen Aspirational Block huam chhunga nu leh naupang hriselna atana hma lakna, Project BLOOM chu NITI Aayog hnuiaia Aspirational District & Block Programme hnuiaia hma lakna tha zual zingah thlan chhuah niin, nimin khan New Delhi-a Vigyan Bhawan-a 'Best Practices Seminar'-ah zir ho atan chhawp chhuah a ni. Lunglei DC project, Project BLOOM (Better Living through Outreach, Optimal Maternal & Child Health) hi India ram puma Aspirational District 329 leh Aspirational Block 500-a hma lakna tha zual, Seminar-a zir ho tura thlan chhuah 19 zingah a tel a. Seminar-ah hian Lunglei District Bawrhsap Pi Navneet Mann chuan 'Project BLOOM' hma lakna leh a hlawhtlinna te tar langin, India ram hmun danga kalpui ve theih a nih dan turte leh hlawhtlinna nasa zawk a awm theih dan turte Seminar-ah hian sawi ho zui a ni. Project BLOOM hi NITI Aayog hnuiaia Aspirational Block Programme-in hriselna leh chaw tha chungchanga hmasawwna tehfung a duan hrang hrangah Lungsen Block-in hma a sawn theihna tur leh zaa za (100%) tihhlawhtlin a nih theih nana ruahman niin, kumin June ni 17 khan kalpui tan a ni a. He Project hnuiaiah hian nu nau paiin damdawi in ngeiah nau a neih theih nan inzirtir niin, damdawi in pan harsatte leh mamawhte tana koh theih lirthei 'SafeWombWheels' ruahman a ni a. Nau nei tur leh buaipuitute lo chawlh lailawkna khualbuk, 'Maternity Waiting Room' siam niin, chaw tha an dawn ngei theih nan ruahmanna siam a ni bawk a. Raipuar an nau pai atanga thla thum chhunga inziak lutte hnenah 'BLOOM Gift Basket' pek niin, in tin tlawh chhuaka inzirtirna leh inchhiarna te, hri danna pek beihpui thlak leh hriselna lama thawktute training pek te pawh kalpui a ni.

Lungsen Block hi Lunglei District-a RD Block 4 zinga pakhat niin, mihring cheng 18,637 an awm a. Block chhungah hian Village Council 24, chhungkaw 3,903, PHC pakhat, HWC pasarih, Health Sub-Centre pakhat leh Anganwadi Centre 44 a awm a ni.



CADC BY-ELECTION

Chakma Autonomous District Council a Kamalanagar West biala By Election neih ah ZPM Candidate Dinesh Moy Chakma thlan tlin a ni.

Kamalanagar West bialtu MDC, Sanjeev Chakma boral avangin State Election Commission ruahmannain he bialah hian by election neih niin, August 6 tunkar Nilaini khan vote thlak a ni a, inthlannaa vote tlate hi vawiin khan DC Office Lawngtlai a Counting Hall ah chahwma dar 10 atang khan chhiar niin, ZPM Candidate Dinesh Moy Chakma chu Vote 724 hmuin thlan tlin a ni.

BJP Candidate Joydeep Chakma chuan Vote 715 hmuin ZPM Candidate nen Vote 9 in an inthlau, MNF Candidate Rupayan Chakma chuan Vote 74 hmuin, Indian National Congress Candidate Pi Kalpana Chakma chuan Vote 21 a hmu a, NOTA ah vote tla 3 awmin, Kamalanagar West By election ah hian Vote 1537 a tla a ni.

Chakma Autonomous District Council hi Governor thuneihna hnuaiah Lawngtlai DC enkawlna hnuaia awmlai a ni.



PINEAPPLE BONANZA

Pineapple Bonanza tum 4-na Millenium Centre kawta buatsaihah Lakhuihthei quintal 36 hralhchhuah tawh a ni a, Pineapple Bonanza hian naktuk inrinni thleng a awh ang.

Mizoram chhunga organic hmanga lakhuihthei tharchhuah man tlawm zawka leittheihna tura Provider - Mission Organic Value Chain Development for North Eastern Region (MOVCD-NER)-in a huaihawt 'Pineapple Bonanza' tum li-na ah hian lakhuihthei leh lakhuihthei hmanga siam theitui hrang hrang zawrh chhuah a ni a, Clover Organic Pvt. Ltd a thawk Pu Joel Laldinmawia sawi danin August ni 6 atanga bultan Pineapple Bonanza ah hian lakhuihthei metric tonne 3.6 hralhchhuah tawh ani a ti a, kuthnathawktute lakhuihthei thar an hralhchhuah a awlsam zawk nan an buaipui vek tih a sawi a ni.

